


7





禁中嘗祀三清公以為非禮請罷其祀

皇太子既出閣屢疏論儲養之道宜遠佞幸親儒臣戒嬉游

勤講讀



上深嘉之太監李廣以方術得幸因而怙權納賄及廣死欲例

加卹典公力陳其不可

上從之 犯大同甚急公疏安邊機宜十二事皆見施行兵部

尚書馬公文升以國用頗乏奏請於南方折銀米內更加
銀若干公執不可曰南方稅額甚重宣德正統間因民不

堪命故立折銀法以寬之今更加若干則反重於本色民
益病矣且足國惟在節用苟用之不節雖加賦何益既而
物議沸騰其事竟寢

孝肅太皇太后崩

上召內閣大臣議陵廟事公等請集衆議以正典禮先是成

仁間

孝莊睿皇后崩禮官預擬二后並祔

太廟至是上從衆議乃別立奉慈殿以奉

孝肅神主如周室姜嫄之祀是雖斷自

聖心而公等固有贊襄之力焉太監齊玄奉使湖廣

勅內欲令便宜行事公不可而止遼東將官張天祥誘殺不

辜以冒功事覺近倖曲為掩覆公力爭忤旨已而率回

上意復溫顏慰諭蓋諒其忠直也內府倉庫諸司宦官莅輸

納者每多索賄賂民不勝其害公嘗乘閒言之

上令撰旨禁約公曰虛言設禁無益也須令曹司搜剔弊端明

白開奏而後嚴立條禁有犯必誅庶可以甦民困

上悅即如其言行之由是諸司宿弊一切革去御馬監軍士多以虛名冒廩賜每託以禁兵不許外知有司莫敢詰至是亦皆覈實兩省糧賞大半荆襄等處流民屯聚生育莫可數計而漫無名籍成化初區處失宜幾至大變公深以為慮每與戶部議思有以處之後司徒韓公言於

上命刑部侍郎何公鑑往經理其事公撰

勅旨令隨宜安集附籍還鄉各從其願於是願附籍者衆所得編戶已三十餘萬復有沮其事者遂中道而止識者恨

之

上在位夕晚益勵精庶務若屯田鹽法馬政邊備等事皆因參等言漸次修舉事方就緒而

宮車晏駕矣至今使人痛惜不已焉

上大漸時公與劉李二公實同受

顧命是蓋乙丑歲也

武宗即阼加公少傅兼太子太傅尚書大學士如故正德丙寅

奉勅同知經筵事修

孝廟實錄為總裁官公以先朝付託竭力輔導凡政事關失極言規諫無所畏避時逆豎劉瑾擅權忌之有附瑾以求進者怨公嘗薦吳王二公以妨其路又從而譖之公見時事漸不可為乃自劾不職力求去位至再至三皆溫旨勉留章四上始允之

賜勅給驛而歸命有司月給祿米五石歲給輿夫八人仍賜襲衣金幣天下聞其去位皆驚愕嗟歎為朝廷惜焉公在

孝宗時寵遇甚厚嘗以瘡疾一日不入朝比朝退則已遣太醫問疾前此所未有也

武宗初即位以顧命大臣尤加優禮竟厄於權奸乃見幾而作瑾猶欲加害遣詞事者旁午卒無所得會鄉人有應

詔薦舉者因累及公遂削其爵後瑾誅始復公名位

今上登極詔加優典尋奉詔進階嘉靖壬午遣官齋

勅存問賜以羊酒命有司月給祿米八石歲給輿夫十人

公遣長子正赴闕謝優詔褒答蔭正為中書舍人正

時有母徐夫人之喪乞終制 上即遣官諭祭者再且治其葬事 賜以米布視常制特加隆焉癸未令有司時加存問丁亥以少師楊公薦遣官齋

勅起公于家仍 命鎮巡等官敦趣上道預戒勿辭且以郭子儀裴度文彥博老年被召故事勉之公遂感激赴 召

上見公至甚喜門生故吏咸以復見公為幸下至衛卒途人聚觀如堵以為盛事

勅改戶部尚書謹身殿大學士餘如故

命總裁明倫大典 上見公拜起頗艱特免常朝戊子從

郊祀 賜錦織大帶

上有御製翊學除夕二詩公等咸和乃編為二帙以

賜縉紳榮之公尋以微疾不出

上遣中官賜食太醫診視復 命鴻臚諭

旨令即出供職公以衰病懇乞致仕

上不得已允之 賜勅給驛還鄉遣官護送輿夫祿米皆仍其

舊 陸辭 錫宴復有金幣寶鏹之 賜公歸適生玄孫

五世相值人以為罕已丑公疾作時中書翰林二君皆居京師聞之即上疏乞歸來春抵家則公疾已愈見二子歸侍樂甚日宴集一堂鄉人羨之是冬疾復作病中寄友人詩有衰殘伏枕還憂國之句蓋其忠愛之心沒身不忘也辛卯元旦力疾具冠服望闕行禮藩臬諸君過訪猶懇懇以民瘼為言無異平日諸子勸進藥餌笑而不答蓋公素知命自度不能起矣至二月十八日子孫家衆咸侍側披衣起坐而逝享年八十有三其生則正統己巳十二月二十八日也公疾革時神思不亂語諸子曰吾生荷國恩已踰涯分莫可為報沒後慎勿求卹典及撫按以訕聞上震悼輟視朝一日遣官諭祭者九命工部治葬事并賜喪具之費贈太傅謚文正謚為

御筆所親定者葬以卒之年十二月十八日墓在杏山之麓配徐氏出同邑許塘鉅族以賢孝著稱累封一品夫人先公十年卒子男六長即正以禮部儀制司員外郎供事內閣德器幹局為士林所重次即丕由京闈解元會試第四

人賜進士及第今為吏部侍郎兼翰林院學士學行聞望視公惟肖為公仲弟于五公後次亘中書舍人次亘左軍都督府經歷為公季弟方伯公後次至次聖皆國子生女二婿曰馮汝材宋惟昭孫男十八長用賓贈尚寶司司丞次用棨用楷用楨用梅用棻蔭國子生用楫用標用檟用攢用張用祝用梯用柯用樞用模用柱用構女孫十曾孫男二敏行尚寶司司丞炳行玄孫男女各二公高額豐頤美鬚長身狀貌偉然望而知其為福壽之相其接人和易恭遜而嚴於守已慎於交際非其義不苟取非其人不苟合為修撰時大臣有附權倖以驟進者其官屬相率求文為賀公力辭之 召入 內閣有司以水手銀若干為贖悉卻之以為重建鄉賢祠費正德初致仕而歸年未六十即築室杏山為終老計足跡不入城府日以吟詠自適與憲副馮公互相贈答有湖山倡和集傳於世居常奉先甚謹每旦必衣冠謁家廟遇先世忌辰雖老猶茹素祭儀一遵文公家禮而少加損益俾世守焉己巳歲饑鄰里鄉

○東山志卷之七
三
黨有貧乏者周卹備至後歲以為常施予不可勝計壬申
海溢溺死者甚衆公募人瘞屍數百居民有被水患者復
出粟賑之海堤為潮水衝齧遺書巡視憲臣大加修築外
復修備潮塘高厚俱倍昔以為永久之計蓋公於民間利
病必為有司言之而此尤其大者鄉人之被其德澤者多
矣推之宰天下亦猶是也始公柄用時資地居其前者尚
多未嘗以越已為嫌其去位也臺諫交章奏留以觸忤權
奸至罹禍不恤其為輿望所屬如此當晚年被 召念

聖恩之不可負則急於趨 命不以衰老為辭暨入 朝三月
度精力之不可強則決於去位不以寵榮為戀茲其出處
之際光明磊落卓然有大過人者非常情所能窺測也平
生著作甚富為詩文皆正大溫厚不事雕琢所以鳴

國家之盛者固當垂之不朽矣銘曰於赫

孝皇勵精圖治爰擇良相朕肱是倚其相淮何太傅謝公公以
舊學簡在 帝衷言聽計從膏澤斯沛爰俾蒼生咸受其
賜雍容廟堂不動聲色四海奠安 國有柱石淮 帝聖

明淮公忠貞上下交孚至治乃成迄膺 顧命以佐
武宗鞠躬盡瘁隨事納忠權奸竊柄事多掣肘見幾而作乃釋
重負徜徉丘壑二十餘年不怨不尤惟命之安

今皇求舊思公如渴 召命是承敦勸何切公感 殊遇慨然
而興 上方傾心以任老成公曰耄矣安能久處三月而
歸浩然莫沮其出何為臣子之義曷遯其歸止足之志公
歸于家子孫滿前迄于五世為曾為玄既壽且樂含笑而
終百福備享古今罕同

帝念耆德 錫之美謚高平涑水厥名可配象賢濟美矧有後
人公雖云巨慶澤斯存杏山之麓公所逸老居斯葬斯萬
世永保

明奉直大夫禮部儀制司員外郎謝公墓誌銘

先太傅文正謝公文學耀于儒紳德行重于鄉邦勲業暨于海宇歷際四朝之盛餘其慶澤鍾于未艾有子若吾茅山公豈惟當代鮮儷信古賢哲者流也公諱正字大中別號茅山文正公冢子妣徐夫人祖簡菴公會祖直菴公以文正公貴俱贈如其官祖妣鄒曾祖妣余俱贈一品夫人家世之懿人不能誦之公甫生三歲徐夫人攜之京誤溺黃河中舟人拯而蘇之識者占公遠到稍長穎敏不羣舉

止如老成篤志向學聲華燁然雖門第貴顯而服御儉約
不異儒素鄉曲無間親疎皆樂從公游文正公在朝公侍
簡菴公家居得其歡心為文莊重典雅隱有奇思咸期青
紫可拾戊午鄉試簾官取公卷寘易房魁方伯孫需意不
合遂落第公雅自守不謁有司故潘臬亦不知為公也聞
之嘆曰如命何遂捐仕進志處分家務條縷井、堂構器
用之具莫不有法雖初自意見必為堅朴久遠之計簡菴
公就養京邸公途間惟取便民舟無跋涉之虞而官私不
擾至今傳美之文正公欲斥逆瑾輩疏三上不報遂乞身
歸田尋以瑾故落職公孝養彌著歷十餘年如晨夕間徐
夫人遘疾公侍湯藥恒色憂暨沒哀毀不離苦塊

皇上登極優崇

先朝元老遺官存問文正公具疏命公入謝

上特旨授中書舍人蓋異數也公終喪就任明慎勤敏克稱其
職內閣邃菴楊公湖東費公深重之尋薦入文淵閣誥
勅房辦事丁亥考績冢宰見山桂公署曰書法有裨國史

才器無忝家聲時論以為信然戊子

上思舊臣遣行人陳侃起文正公于家及至仍命入內閣

同邃菴楊公羅峰張公協心輔理文正公尋以疾懇歸疏
至再四

上始允之特遣公護送抵家北上復命己丑克會試掌卷官公
弟今吏部侍郎汝湖公在京退食之暇怡々相樂嘗

錫宴于禮部公與汝湖公皆與焉汝湖公班次在上羅峰張
公欲公暫避公曰此

朝廷盛典何得以私故相避耶毅然不顧文正逾八袞公給
假歸省汝湖公亦送其繼母陸太淑人偕歸文正公甚喜
憫未數月文正公考終公齒已踰耆居喪如喪徐夫人時
其薦孝出於天成壬午北上舟泊雷城是夜颶風暴雨大
作舟為之飄播十餘里傍人知為公舟同聲祝禱恙也已
而果然蓋平生盛德之報類如此至京與修

皇史成陞禮部儀制司員外郎乙未克侍經筵官公適得二
子孫敏行授尚寶司司丞時汝湖公同寓長安里第中書

君文中後府都事君恒中亦相侍周旋棠棣之輝不足詠
已公自惟止足之誼上疏乞休 內閣及銓部堅留之不
果適

遼王膺冊封

命公持使節副往事後又授疏懇于朝得請縉紳間猶惜公之
亟去也公八袞步履益康健而林壑之興彌高其年安備
員南都刑曹公命駕來游歷覽鳳臺燕磯之勝望之如神
仙中人比歸逾年其孫敏行奉使楚藩則又偕往弔赤髀
之遺迹訪黃雀之故樓久之廼沿江東歸安復得拜公無
中雖蔗境不假几杖其意氣卓逸殆鮮及焉庚戌安失內
助訃告公念女甚哀其年尚寶奉使歸侍公偶嬰微疾自
知不起處分後事神志不亂蓋深達死生之故云公生于
成化戊子卒于嘉靖辛亥享年八上有立配贈宜人徐氏
同邑大理寺評事徐公諫之女有賢行姑氏徐夫人治家
甚嚴而承侍備至甘旨必親調閨壺則之潮患後遺骸蔽
道亟捐金募人瘞之里姬以貧乏告輒脫簪珥為贈冢子

用賓早逝撫教孤孫迄于成立至於綜理家政特其緒餘
先公十五年卒子三長即用賓次用櫛用櫛公性寬厚和
易及遇事裁決恒持古誼不可移度量休々然嫉惡懲忿
不遽見諸詞色平居不任杯酒遇客燕坐竟夜不倦財利
施予不少吝族黨有售欺者知之亦不復較文正公久居
重任公戒飭僮僕不以纖毫干公府以故文正公之賢益
彰初文正公三品考績例蔭子入監公念汝湖皆繼叔
氏選後乃請于文正公遜弟入監汝湖公遂由牀闈解元
登乙丑榜及第馳封其繼父母族里皆嘉其義讓友愛諸
弟甚至財帛不入私橐產業必令意擇而自取其瘠者言
笑動履之間必以禮自將每見炫門第涉紈袴態輒心鄙
之殆其天性然尔旁通羣藝於四體書法罔不究心其真
草出入顏趙間世稱其能其篆隸有秦漢風致已具神品
西涯李公與論篆法雅敬服之公每謂安輩曰後當有知
吾書者恐吾沒後吾書亦不易再得今憶斯言昔人所謂
後千年無人篆止於斯諒矣公沒之明年始克襄事于汪

家舉啓徐宜人之壙而合葬焉禮也墓銘久未有屬敏行具狀拜請于安安為子婿知公行最詳其受公恩亦最深頃年出守衡郡簿牘方殷未克秉筆茲入覲敏行就寓重請追慨遺誨且泯沒是思乃述公行之槩而系以銘曰

於維世祿

雖賢楨志

競爽自淑

乃與衆異

惜無方皋

失茲良驥

試于有位

已占闕器

爰掌絲綸

人文是賁

邦禮攸司

庶事先治

覽輝鳳池

世業靡墜

輿望方隆

猶期不次

云誰之思

託懷薜荔

力未就衰

高尚其事

夷猶山水

造物安忌

彼其何心

夜行勿置

鬱之湖原

泉臺永閟

惟此貞珉

百代所企

賜進士出身中順大夫湖廣衡州府知府前南京兵部職方

清吏司郎中婿胡安謨

通議大夫吏部左侍郎兼翰林院學士贈禮部尚書汝湖

謝先生行狀略

汝湖先生諱丕字人中姓謝氏特進光祿大夫左柱國少

傳左部尚書謹身歟大學士贈太傅謚文正公仲子也其
先陽夏人晉太傅文靖公安僑寓會稽之始寧因家焉其
後裔造徙台之臨海宋太傅惠正公之五世孫有長二者
自臨海復徙餘姚居東山之四門是為避地之始祖也至
高祖原廣有隱德曾祖直菴福建布政司都事沙尤之變
嘗活萬餘人祖簡菴舉經明行修弗起俱以文正公貴累
贈如其官高祖妣嚴曾祖妣余祖妣鄒俱累贈一品夫人
母夫人徐成化壬寅四月十八日生先生于京邸時文正
公仲弟于五公蚤世配陸節守嫠居即命為之後先生穎
異不凡甫七歲塾師授以句讀過目輒成誦聲對敏給動
止若成人趨庭嗜學不煩程課振藻有奇思文正公占其
遠到命從西涯李公授業辛酉年十九以文正公三品考
績恩入國學讀書舉順天鄉試第一人乙丑舉會試第四
人廷試第一甲第三人授翰林院編修正德改元上
兩宮徽號推恩階文林郎贈于五公如其官封繼母陸太孺人
妻毛孺人先生請告歸省頃之逆瑾構禍文正公見幾勇

退既而落職瑾移怒先生亦為民後瑾誅文正公與先生
皆復官躬肥遯嘉遯二墅日與高人燕集文正公家居喜
接後進先生尤加意獎掖凡雋異之材必欲成就之以濟
世用贈閣學醉夢呂公與先生為莫逆交攜冢嗣今大學
士本卒業時若刑部員外郎鄒綬兵部主事諸燮苑馬卿
胡安而臯亦竊附焉先生立教重經義治事有宋湖學風
士爭興起遠方來學者踵至丁丑文正公患頸疽幾殆先
生與伯兄正不脫冠帶日夕侍湯藥已而獲愈人謂孝感
所致戊寅陸太孺人守節四十年有司具奏旌表

世宗龍飛奉 詔徵用時居徐夫人喪甲申始起復除翰林編
修陞俸一級乙酉

武廟實錄成陞左春坊左贊善賜白金文綺秋八月同石門翟
公主考順天鄉試時稱得人丁亥陞太常寺少卿提督四
夷館兼翰林院侍讀是年文正公被召再入閣戊子先生
充經筵日講官士林榮之無何文正公乞休欲請告侍歸
文正公止之曰日講臣子效忠啓沃時也母舅曠弗果庚

寅陸太恭人有鄉思疏得

俞旨馳驛侍歸 賜白金文綺寶楮及歸文正公適伏枕若有
所啓者辛卯捐館甲午始起復任掌院事 賜雲鴈襲衣
四書大全書傳乙未

孝靜毅皇后梓宮發引特命捧主

上臨軒策士特命讀今禮部尚書吳山卷孟冬時享

太廟特遣行禮先生侍日講未有翰林帶銜會推兵部侍郎李
公廷相充講職兼翰林院官奉 內批亦兼翰林院學士

每進講敷陳剴切而儀觀詳雅

上為之傾注自是

寵渥日深遣祭 先師廟從幸 山陵 賜孔雀襲衣金帶銀

瓢修飾 七陵洎預建

壽宮 命同大學士未齋顧公往祭

天壽山之神尋轉吏部左侍郎兼翰林院學士仍掌院事贈于

五公如其官封母太淑人妻淑人

東宮誕生遣祭 內殿 恩賚有加蔭長子用棧入監讀書

隨命充管錄累朝寶訓實錄官同修 大明會典捧

孝肅 孝穆 孝惠三后神主奉安陵殿駸 大用美丁酉陸

太淑人下世禮部以聞

上嘉母節遣官諭祭加 賜寶鏹給驛歸其喪仍遣官祭葬先

生廬墓側哀毀過禮服闋巡按傅公鳳翔具疏薦起而先

生臥弗應因修譜謀創三太傅祠於杭文正公祠校邑之

龍泉山避地始祖祠於四門之西置義倉義學施藥餌以

拯貧病造橋梁以濟行旅鄉人多德之後有被召當國者

與先生為寮舊道武林避不一見輦轂權近亦不一通聞

即汝湖勝處葺東巖關畱園為逸老所盤桓其間因自號

畱園野叟癸丑四月倭寇突至焚掠無遺先生驚然自得

丙辰夏倭寇復動勦時且病間關至越當道過訪尤倦

以民生疾苦為言病亟歸次東關命其子曰吾生荷

國恩已溢涯分莫可為報身復慎勿乞 卹與抵家居正寢

有頃脩然而逝十一月二十四也享年七十有五用拭念

先人

聖眷素渥以訃聞

上憫悼勅該部舉

卹典贈禮部尚書營葬

賜祭二壇與毛

淑人合葬于禾季墩之原禮也毛淑人刑部郎中恒齋公

實之女無出閫所修脩先五年卒先生天資爽邁風度瀟

灑文章典雅清動指趣雋永不襲用陳言國家典故時政

臧否精練登達早歲有經世志而柅于逆墜厥後知遇

聖主庶幾文正之業旋以憂去位既歸放浪湖海不復求用于

世而世亦不知復用先生然矯矯風節世之媿媿脂韋者

聞之可以存立矣廼者用杖等每思墓木已拱墓碑未立

是懼以狀來屬臯在門墻父知先生為詳詮述彙行莫敢

誰辭謹掇其大者于篇以備執筆者採焉

門人侍御徐九臯撰

資政大夫工部尚書贈太子少保謚文莊謝公行狀

公諱一夔字大韶姓謝氏其先本晉太傅文靖公安之裔

徙南昌

新建之古源祖永亨避仇匿媼女王氏遂從其

姓及公貴顯廼請于朝復先姓云父得仁為汀州經歷以

廉惠得民部使者薦之陞推官讞獄明恕正統己巳大盜
起沙縣攻圍汀城勢張甚郡推集民兵助閩帥守御屢挫
賊鋒既解圍官軍執村氓四首餘誣為賊又為力守禦屢挫
民德之及卒汀州人建祠以祀焉公天資溫粹弱冠登翰
林侍講書水尹鳳岐先生讀蔡氏書先生覽其所作經義
論策大加稱賞語諸生曰大韶他日所就吾不及也喜於
文字間見之矣郡推舉于行營公扶柩歸葬居喪讀禮
跡不至城市免喪以所業赴江西鄉試名在前列曾試禮
部以書經魁天下及廷對

英宗皇帝策以禮樂刑政之要公所對上推唐虞三代之盛下
及漢唐宋沿革之詳凡三千餘言末又曰禮樂之本刑政
之原不外乎一誠臣願陛下運此誠以興禮樂則大禮與
天地同節大樂與天地同和矣運此誠以用政刑則一政
之出人信之如著龜一刑之施人畏之如鈇鉞矣

英廟覽之深契聖衷賜進士第一擢翰林院修撰又命公與庶
吉士楊英等同進學於翰林俾讀中秘書繇是所學益專

所得益精發為文章不為奇崛雕刻之詞而純灑淵永人
共推服少保李文達公尤重公每以偉器期之修

英廟實錄文達為總裁以公為纂修官據事直書得史官體今
皇帝初御經筵以公為講官賜銀二十兩鈔二千貫紵絲二表
裏實錄成陞左春左諭德加賜銀幣尤厚公因請假歸
省先塋抵家捐俸立義學以教族黨鄉閭之子弟又置義
田義倉以賑貧無以養者郡推祠在汀躬往祭奠遺民迎
拜公接之無貴賤皆與抗禮汀吏民咨嗟頌之馬暨還京

會朝廷以星變求言公上疏陳五事一曰正宮闈以端治
本二曰親大臣以詢治道三曰開言路以決壅蔽四曰慎
刑獄以廣好生五曰戒妄費以足財用忠懇剴切多人所
不敢言者士大夫翕然稱之雖不識公者讀其疏亦皆慨
嘆想見其為人上以宋元二史予奪迄無定論特命內閣
儒臣妙選學識老成者用朱子書法編纂成書以續通鑑
綱目時翰林在選者僅十有四人而公與焉公分修元史
因推廣前待制王禕之論以為泰定帝為世祖長孫宜承

大統燕帖木兒通立明文不過欲因際會圖富貴爾故於
燕帖木兒舉兵以謀逆書凡以兵附燕帖木兒以謀叛書
於上都遣兵以討叛書一正前史之謬君子躉之書成進
御陞翰林院學士賜宴於文華門右廊又賜鈔一千貫成
化十四年二月

皇太子出閣詔簡儒臣充東宮官公與學士彭公彥實等皆
以學行選侍講讀十九年九月陞禮部右侍郎凡制度儀
文多所裁定前所未有必稽經考史參以

祖宗舊制具為儀注務使可行二十二年冬陞工部尚書工部
所掌素號繁猥而工匠之長號作頭持吏短長恣為奸利
公躬校案牘嚴勾稽剔蠹弊謹物料出納之數正匠作逋
匿之罰黜遣作頭不得近左右凡有營繕必計程期慮財
用以授屬官之廉能者使董之故費出有經人無久役二
十三年春公得痰咳疾在告三月上書辭俸優詔不允夏
五月疾稍愈亟出視事俄而病復作易數醫寢劇卒之晨
命僕取水盥頰訖衣冠出坐小齋指日言渴侍者以湯進

飲之又進粥未及食溘然而逝是月十有九日也享年六十有三事聞贈太子少保謚文莊賜鈔萬貫贖其家遣官諭祭者再命有司營葬公天性樂易待人接物一本於誠尤篤於友誼有誤雅法網不能自直者必語所司為辯之不啻已事或材可用而沉淪下僚者薦諸當道拔而用之不宰客死者為歸其喪或卹其妻子在翰林屢典文衡嘗考禮部貢士得羅倫置諸魁選已而倫以狀元及第考南畿貢士得王鏊以冠多士及試大廷鏊名在第三人皆服

其鑒別之精自少好學至老不倦所著有古源文集若干卷藏于家娶鄧氏有賢行累封淑人先公三年卒葬邑之某原至是諸子卜以某年某月某日奉公柩合葬焉子男三曰綱鄉貢進士先公九年卒曰紀曰經女二長適國子生余校次適國子生況鑾皆官家子也孫男五曰麟邑庠生曰驥國子生曰鳳曰驊曰騶俱習舉子業惟公以大魁致位司空文行卓然為士林模楷其歿也當寧嗟悼卹典優隆可謂哀榮兼至者已公官居二品隧道有碑幽窀有

銘宜得當世名儒為之論次以垂不朽喬新與公生同鄉
仕同朝居又比舍相知最深謹述公世系行已歷官之槩
以俟立言君子采摭焉

廣昌何喬新撰

東山志卷之十八

祝文

杭城三太傅祠文

於維三公望隆奕世秀毓東溟匡扶晉宋弼亮

皇明柱砥中流鴻圖敕定功業文章後先輝映吳山浙水寢廟
有嚴令儀孔赫百世具瞻其等承之茲邦景賢慕德永奠蒸嘗
神風昭格 浙江巡按監察御史傅鳳翔撰

上蔡文肅公祠文

先生道宗孔孟業授二程克己去根持敬惺々以所自得發明
經義功在聖門澤延後裔先生神爽諒亦在茲尊俎三遷雲山
有祠雲山奕々是瞻是式百千萬年禮祀無斁

皇帝遣浙江布政使司左叅政周季麟

諭祭于封右春坊右諭德謝恩

曰惟爾稟通敏之資擅明經之譽和易接物雅善存心教
子義方而早魁甲榜侍朕講席而克効忠誠肆封命之累
頒胡壽年之弗永訃音忽至卹典宜申特命有司為營葬

祭爾靈不昧尚克歆承

皇帝遣浙江布政使司右叅議方全

諭祭于詹事府少詹事兼翰林院侍講學士謝遷母宜人
鄒氏

曰惟爾婦道母儀著稱閨闈篤生令子魁選賢科進講慎
勤實由慈訓既膺封命宜享壽榮胡為一疾溘焉長逝特
超常典勅以葬祭爾靈不昧尚克歆承

諭祭九壇

初喪

皇帝遣浙江布政使司左叅政任忠

諭祭于致仕少傅兼太子太傅左部尚書謹身殿大學士
謝遷

曰卿以純正之學弘博之才擢冠甲科歷官侍從經帷獻
納一本於誠史局編摩克持以正東宮輔導務心多啓沃
之功秘閣登庸

顧命受匡扶之託中遭權抑養晦無尤朕念老成敦迎再起
四朝碩輔一代名臣方諮諏以嘉猷乃辭榮而引退蒲輪遣
使綸詔覃恩壽考全歸榮哀何憾訃音忽至良用悼傷爰
命有司特賜葬祭靈其如在尚克歆承

首七一壇

曰卿端懿明粹弘雅公清歷事

累朝忠藎茂著令聞碩德載在典彝日月不居倏臨首七乃
申卹典諭祭載頒祀原不昧其歆承之

一七 三七 四七 五七 六七 七七

下葬各一壇

文俱同但首七改某七
下葬改窀穸

諭祭二壇

初喪一壇

皇帝遣浙江布政使司左叅議顧璘

諭祭于致仕少傅兼太子太傅禮部尚書武英殿大學士

謝遷妻封一品夫人徐氏

曰爾以衣冠著姓懿行夙彰配德鴻儒允宜家室持身正
內教子成名屢被恩褒晉隨朝謁夫階峻陟寵命荐加秩

冠品流光生族里高年盛福增重世家桑梓優游方期偕
老胡然一疾遽告長終眷我舊臣特頒卹典遣官諭祭以
示殊恩仍勅有司為營葬域靈其不昧尚克承之

下葬一壇

曰爾以元臣嘉配內助恒多疊受褒封旋躋極品淑慎之
行莊肅之規嗣美國風光我王化孫曾茂衍福壽兼隆追
念死生榮哀具稱茲臨窀穸載祭爾靈九原有知庶其歆

慰

文正公祠文 監察御史傅鳳翔

惟公秀鍾全浙靈毓東溟四朝憑翼羣公典刑舜水湯龍山
奕々寢廟有嚴蒸嘗罔極

褒忠祠文 太子太保兵部尚書胡宗憲

惟君繩武名家儲英胄監倡義攘夷捐軀赴難激揚忠節錫命
自天翼祠文正血食絲々

又 監察御史趙孔昭

宰輔之裔簡命未授尚爾家食夫孰不欲坐享平康焉敢近夫

鋒鏑子獨豪宕慷慨忠勇天植國步多艱兵燹靡一一旦胥至
於姚地而將司奪魄者卒至於竄身而無策子乃挺身格鬪自
朝至夕射傷數賊力屈而斃此豈訐謨之弗臧實天欲成乎大
節嗚呼血流山谷身膏草野攄忠王事子固一世之英傑家聲
賴子以耿光材官用是而奮激褒錄之典常濟美於先哲孔昭
風紀一方聞之哀裂茲陳薄奠預昭忠節

活人陰騭出王俗編 謝鐸述

餘姚謝瑩為福建藩司都事南昌王仁亦為汀州郡經歷仁之

先亦謝姓王則從其外氏也瑩剛直而仁廉惠正德間會沙賊
鄧茂七流劫郡邑瑩與仁俱以才猷檄守松谿政和之役以計
擒其首惡而協從者悉原之還所掠婦女老幼若干人民獲安
堵按王謝仕非甲科官皆幕屬能悉心為民禦災捍患所全活
者幾千萬人其功德之顯莫如此而陰隲於冥冥者重矣瑩之
孫遷登成化乙未狀元及第官至少傅大學士謚文正迪亦舉
進士官至布政使曾孫丕亦以解元及第官至少宰仁之子一
瓊登天順庚辰狀元及第官至工部尚書復其原姓孫曾連登
甲第為少卿為御史二氏籍黻縣不絕迄今尤盛由是觀之
人患不為善耳苟存一念之善天道好還報自不爽傳曰積善
之家必有餘慶信夫



